

5/58 COMPATIBILIDADE DO EXERCICIO DA ACTIVIDADE PROFESIONAL DE AVOGADO COA TITULARIDADE DA CONCELLERÍA DELEGADA DE MOVEMENTOS MIGRATORIOS, POR PARTE DE DON WALDIR SINISTERRA RESTREPO, COA PERCEPCIÓN DAS RETRIBUCIÓNS POLO EXERCICIO DESTE CARGO EN RÉXIME DE DEDICACIÓN PARCIAL (2025/G004/000201).- Examinado o expediente tramitado para os efectos e vistos:

1.- PROPOSTA DA ALCALDÍA, do 15 de abril de 2025, do teor literal seguinte:

“Examinado o expediente tramitado para os efectos e visto o informe elaborado pola secretaria xeral do Pleno, o 14 de abril de 2025, que é do seguinte teor:

“Visto o Decreto da Alcaldía número 2730/2025, do 20 de marzo de 2025, que, entre outros aspectos, no seu parágrafo DÉCIMO procede á designación dos titulares das concellería delegadas, entre os que se atopa D. Waldir Sinisterra Restrepo á fronte da de Movements Migratorios.

Tendo en conta a solicitude presentada, o día 4 de abril de 2025, por D. Waldir Sinisterra Restrepo, na que expón que foi elixido concelleiro do Concello de Lugo o día 11 de marzo e que solicita a compatibilidade para o exercicio da súa actividade profesional como avogado e que a actividade se desenvolve sen dedicación exclusiva.

E vista a Lei 31/2022, do 23 de decembro, de presupostos xerais do Estado para o ano 2023 (prorrogado), relativa ao réxime retributivo dos membros das corporacións locais, a Lei 7/1985, do 2 de abril, reguladora das bases de réxime local, a Lei 53/1984, do 26 de decembro, de incompatibilidades do persoal ao servizo das administracións públicas e demais regulación concordante, resulta que:

Primeiro.- As percepcións retributivas polo exercicio do cargo con dedicación parcial ascenden a **16.414,16. euros**.

Segundo.- Estas retribucións correspóndense co 30% das retribucións correspondentes aos cargos de concelleiros delegados con dedicación exclusiva, sendo o réxime de dedicación mínima igualmente o 30% da xornada ordinaria na Administración pública (37,5 horas semanais) cun mínimo de 12 horas semanais.

Por todo o anterior, a funcionaria que subscribe entende, á vista da solicitude, que é compatible o desempeño do cargo de concelleiro delegado co desempeño da actividade privada de avogado dado que se cumpren os supostos para compatibilizar ambas as dúas con base nas seguintes consideracións xurídicas:

Primeiro.- En relación coa natureza da ocupación ou actividade privada para a que se solicita a compatibilidade -segundo a solicitude formulada polo interesado e declaración de intereses-, é a de avogado, actividade profesional que desenvolve o solicitante como autónomo (é dicir, sometido ao réxime RETA), por conta propia,

engadindo na súa solicitude que non exerce esta actividade con carácter exclusivo. O exercicio desta profesión tampouco lle impediu tomar posesión como concelleiro nos termos do artigo 178.2.a) da LO 5/1985, do 19 de xuño, ao non darse o suposto de feito previsto na dita norma.

Segundo.- A segunda cuestión para ter en conta é o réxime de dedicación establecido. O recoñecemento da dedicación parcial supón que a actividade do concelleiro non é nin tan sequera preferente (como o sería se a dedicación fora exclusiva) polo que non pode impedir que poida desenvolver outras actividades remuneradas.

Agora ben, en ningún caso, nin a dedicación parcial nin a exclusiva poderán causar detrimento á súa dedicación á corporación nin relacionarse coa actividade municipal nin cos labores que desenvolva como concelleiro delegado.

Chegados a este punto, e para aclarar que se entende por dedicación parcial, podemos citar a sentenza do Tribunal Superior de Xustiza de Andalucía, do 23 de febreiro de 2018, Sala do Contencioso-Administrativo de Málaga por canto esta analiza o suposto, dun réxime de dedicación parcial superior ao 75% (exactamente do 90%, para o terceiro tenente de alcalde). O Tribunal considera que debe existir algunha diferenza entre a dedicación exclusiva e a parcial, sen que a diferenza entre a exclusiva (100%) e a parcial sexa tan insignificante que permita aludir as restricións legais.

Recoñecendo que o límite do 75% está fixado polo lexislador para os municipios de poboación inferior a 1.000 habitantes, considera o Tribunal que, aínda que sexa para os efectos orientativos, pode resultar de interese atender a tal porcentaxe (disposición adicional vixésimo sétima. Réxime retributivo dos membros das corporacións locais na Lei 31/2022, do 23 de decembro, de presupostos xerais do Estado para o ano 2023). Por prudencia económica e xurídica, os operadores xurídicos locais podemos considerar admisibles o 70% de dedicación á actividade pública, tendo a certeza e garantía xurídica de que se adecúa ao ordenamento.

No caso obxecto deste informe, trátase dunha dedicación parcial retribuída do 30%.

Terceiro.- Con carácter xeral e como se ten dito, sempre que a actividade privada non se relacione coa actividade municipal e cos labores da Concellería Delegada, e tratarse dunha actividade que non cause detrimento á súa dedicación á corporación, non hai inconveniente para que o Pleno poida conceder esta compatibilidade. Agora ben, estamos a tratar a posible compatibilidade coa dedicación parcial, polo que procede a análise do artigo 75.2 LBRL:

“2. Os membros das corporacións locais que desempeñen os seus cargos con dedicación parcial por realizar funcións de presidencia, vicepresidencia ou ter delegacións, ou desenvolver responsabilidades que así o requiran, percibirán retribucións polo tempo de dedicación efectiva a estas, nese caso serán igualmente dados de alta no réxime xeral da Seguridade Social en tal concepto, asumindo as corporacións as cotas empresariais que corresponda, salvo o disposto no artigo anterior. Estas retribucións non poderán superar en ningún caso os límites que se fixen, se é o caso, nas leis de orzamentos xerais do Estado. Nos acordos plenarios

de determinación dos cargos que leven aparellada esta dedicación parcial e das súas retribucións, deberase conter o réxime da dedicación mínima necesaria para a percepción das devanditas retribucións.

Os membros das corporacións locais que sexan persoal das administracións públicas e dos entes, organismos e empresas delas dependentes soamente poderán percibir retribucións pola súa dedicación parcial ás súas funcións fóra da súa xornada nos seus respectivos centros de traballo, nos termos sinalados no artigo 5 da Lei 53/1984, do 26 de decembro, sen prexuízo do disposto no apartado sexto deste artigo”.

Como podemos observar, e a diferenza do que ocorre coa dedicación exclusiva, os membros das corporacións locais que desempeñen os seus cargos con dedicación parcial non estarán suxeitos á LIPSAP, cunha única excepción: se os membros da corporación con dedicación parcial son persoal das administracións públicas, nese caso si que estarán sometidos á devandita lei.

Polo tanto, non existirá incompatibilidade entre o exercicio da profesión de avogado e o cargo de concelleiro delegado. Se o concelleiro delegado non ten dedicación exclusiva, senón parcial, e ademais non é persoal doutras administracións ou dos seus entes dependentes, non está suxeita neste caso á Lei 53/1984 de incompatibilidades, e non terá que solicitarlle ao Pleno a compatibilidade desta actividade privada que exerce coa súa dedicación parcial e se a solicita, o Pleno terá que concederlla.

Este é o meu informe que someto a calquera outro mellor fundado en dereito. Non obstante, a corporación adoptará o acordo que estime oportuno.”

Esta Alcaldía, con base no informe sinalado e de conformidade co disposto no artigo 75.2 da Lei 7/1985, do 2 de abril, Reguladora das bases de réxime local, **PROPONLLE** ao Excmo. Concello Pleno autorizar a compatibilidade solicitada por don Waldir Sinisterra Restrepo para o desempeño do cargo de concelleiro delegado de Movementsos Migratorios co exercicio da actividade privada de avogado.”

2.- INFORME DE FISCALIZACIÓN asinado pola xefa da sección de Fiscalización Previa e pola Interventora xeral municipal accidental, do 16 de abril de 2025.

3.- DITAME FAVORABLE da Comisión Especial de Contas e Ordinaria da Alcaldía, Recursos Internos e Proxecto de Cidade, emitido na sesión celebrada o día 25 de abril de 2025.

Ao non suscitarse debate, sométese o asunto directamente a votación, acadándose os seguintes resultados:

Votos emitidos: 25

- **Votos a favor:** 13 dos Grupos Municipais do Partido Socialista de Galicia-PSOE e do Bloque Nacionalista Galego.

- **Votos en contra:** 0

ACTAS E GOBERNO

ARG/jch

Refº: ispac4391691924408027325.doc

Asunto: PLENO ORDINARIO DO 30-4-2025

- **Abstencións:** 12 do Grupo Municipal do Partido Popular.

En virtude de todo o cal, o Excmo. Concello Pleno, por maioría absoluta, **ACORDA:**

AUTORIZAR a compatibilidade solicitada por DON WALDIR SINISTERRA RESTREPO para o desempeño do cargo de concelleiro delegado de Movementsos Migratorios co exercicio da actividade privada de avogado.